

N° 2023/O1/038

Question orale déposée par M. Saveriu LUCIANI
Au nom du groupe « Avanzemu »

OBJET : **Lingua corsa**

O sgiò Presidente,

Per una volta a ci feremu corta nant'à a descrizione è a ripresentazione simbolica di u Corsu.

Guasi dui anni dopu, ci sia cuncessa d'interrugavvi, un'antra volta nant'à a gestione d'un cartulare fondamentale in a custruzione di a nazione Corsa muderna.

Passeremu in furia nant'à l'acquisti di st'ultimi 50 anni, quelli di u Riacquistu è dinò di l'eredi di ste mosse di tandu.

U Corsu s'hè stallatu in u discorsu cumunu è stu populu brama, omancu in i so ogettivi sucetale, di fanne a lingua di u pane sicuru.

Di pettu à u Statu, st'ultimi anni, avemu pruvatu à prumovelu, puntati da un sforzu educativu maiò. Ma Parigi ferma Parigi è cerca à tutti i patti à riducene u so spaziu è u so usu, cunsiderendulu solu è sempre da disciplina sculare.

Quì dinò ùn ci hè tantu bisognu di sviluppà i so mendi, ma ùn basta à spiegà u bilanci u mezu mezu di a situazione oghjinca.

Ci avete spostu mesi passatoni una strategia, mettendu in anda un ciculu di travagliu è di riflessione anc'à compie. Capiscerete ch'intantu, sò belli silenziosi sti dui anni di frattempu, senza a minima cumunicazione nant'à ciò ch'ellu si face, o ch'ùn si face, ciò ch'ellu si discute, è peghju, ciò ch'ellu ùn s'hè pussutu fà o prumove.

Sò centinaia d'insignenti è millaie di zitelli in attesa, ci hè una giuventù in bullore è una sucetà chì s'arreghe. Stu viotu incuragisce u Governu Francese quand'ellu si parla di cuufficialità per facci a lezziò di republicanisimu è inchjaccacci à a bella megliu cù di fattu, u munulingusimu di statu, è, per facci tace, a so scusa linguistica regionalista di u « nous faisons beaucoup pour le corse ».

U tribunale amministrativu ùn hà fattu chè incalcà nant'à st'analisi. Unepochi di punti fermanu indecisi...ch'elli sianu digià spenti o maladicciosi.

Dipoi stu tandu di ghjugnu di u 2021 è ciò ch'ellu hà battizatu, ùn hè tantu, un'elettu di a vostra magiurità « le mercato », parlandu ghjustu à puntu di quelli ch'anu rimpiazzatu nazionalisti, ùn si hè intesu nunda.

Dipoi tandu u rettore parla di lingua in salute è u versu sucetale aspetta.

Avemu avutu u risultatu ufficiale d'un'inchiesta cummandata trè anni fà - ne cunnisciamu digià u bilanciu nanz'à l'elezzione territoriale.

Aspettemu sempre u CPER 2021-2027 - v'avia postu a quistione tanti mesi fà - è mi ricordu bè di l'annunziu fattu, di veranu 21 di u duppiamentu di u sforzu finanziariu. Ma à chì ne simu ?

U seguitu di a convenzione di u 2016, un'antra primura, à appaghjà, ùn si ne vede stampa.

U Cunsigliu Accademicu Territoriale mai addunitu dipoi 2 anni è mezu.

U CALCC, senza a presenza d'un elettu di l'Esecuttivu, reunitu settimana fà ...

Vi puderia parlà d'altre rivendicazioni, cuncorsu unicu di i professori di e scole, di u ben di nutiziale di Corse Matin, di i corsi gratisi per e persone maiò ch'ùn esistenu più, tir'avanti è tocca.

Perfine, chì risposte fattive per a muzione vutata à l'unamimità in fin' d'annata 2022 ?

Piantu quì, sapendu ch'ellu ùn ci hè bisognu di spiegavvi ciò ch'è n'aspettemu.

Micca e litanie, o sgiò presidente, di quelle chì ci dumandanu di sperà o di crede.

A Corsica chì ci aspetta è chì ci cura, chere un antru avviu, dopu à cusì longa attesa.

Dui anni sò longhi. I seculi di prima eranu ghjorni ma i ghjorni d'oghje, a sapemu tutti, sò propiu seculi.

A lingua di tutti, a lingua per tutti, moltu più in stu crucivia di i neguziati, in stu cunfrontu spripusitatu d'una rimigna demografica è di l'ambizione cumuna di fà nazione in u Mediterraniu, sta lingua aspetta.

Chì risposta li date stamane ?